

DAIM NTAWV TEEV COV LUS QHIA QHOV TSEEB: Cov Txiaj Ntsim Zoo thiab Phem Ntawm Yam Tshuaj Tiv Thaiv Kab Mob COVID-19 Johnson & Johnson

Raws li txoj kev tshawb fawb los ntawm cov kws paub txog tshuaj tiv thaiv kab mob nyob hauv lub teb chaws, peb paub tias cov tshuaj tiv thaiv tus kab mob COVID-19 yeej muaj txiaj ntsim zoo ntau tshaj li qhov phem. Nkag siab txog cov txiaj ntsim zoo thiab phem ntawm txoj kev mus txhaj yam tshuaj tiv thaiv kab mob COVID-19 Johnson & Johnson uas txhaj ib koob xwb thiab yuav tiv thaiv koj ntawm tus kab mob COVID-19. Pib thaum 12/16/21 CDC yeej pom zoo raws li cov lus kho dua tshiab los ntawm pawg txwj laus Advisory Committee on Immunization Practices (ACIP) cov lus pom zoo rau txoj kev tiv thaiv tib neeg ntawm tus kab mob COVID-19, uas hais tawm tias lawv pom zoo kom cov tib neeg mus txhaj cov tshuaj tiv thaiv kab mob COVID-19 mRNA (tshuaj tiv thaiv kab mob COVID-19 Pfizer los sis Moderna) es tsis txhob mus txhaj yam tshuaj tiv thaiv kab mob COVID-19 Johnson & Johnson. Yuav tsum tsis txhob muab yam tshuaj tiv thaiv Johnson & Johnson koj mus siv txawv qhov peb tau muab qhia nyob rau hauv qab no.

Hais Txog Yam Tshuaj Tiv Thaiv Kab Mob Ntawm No

Yam tshuaj tiv thaiv kab mob ntawm no yeej tau txais kev tso cai los ntawm FDA kom koj mus txhaj rau cov tib neeg nyob rau lub sij hawm tam sim no uas tseem muaj tus kab mob COVID-19 sib kis loj thiab pub koj mus txhaj rau cov tib neeg muaj hnuv nyoog 18 xyoo thiab laus dua. Yam tshuaj tiv thaiv no yog ib yam uas muab ua ib koob txhaj thiab muab txhaj rau ntawm cov leeg nqaij xwb.

Thaum Twg Koj Thiaj Li Yuav Tau Xav Saib Koj Puas Yuav Mus Txhaj Yam Tshuaj Tiv Thaiv Kab Mob Ntawm No

- Ib txhia tib neeg yeej mus txhaj tsis tau lwm yam tshuaj tiv thaiv kab mob COVID-19 vim lawv muaj tej yam teeb meem (piv txwv, ib txhia tib neeg yeej muaj ib qhov kev fab tshuaj loj tom qab koob tshuaj uas lawv nyuam qhuav mus txhaj tag los no).
- Rau ib txhia tib neeg, yog tias lawv tsis txhaj yam tshuaj tiv thaiv kab mob COVID-19 Johnson & Johnson, lawv yeej yuav tsis txhaj ib yam tshuaj tiv thaiv kab mob COVID-19 li.
- Ib txhia tib neeg uas lawv tseem tsis tau txhaj tshuaj tiv thaiv kab mob COVID-19 yeej tsis muaj cib fim yuav mus txhaj lwm yam tshuaj tiv thaiv kab mob COVID-19 li.
- Peb pom zoo kom cov tib neeg ntawm no mus nrog ib tus kws kho mob sib tham hais txog cov tshuaj tiv thaiv kab mob COVID-19 uas lawv yuav mus txhaj tau.

Tej Yam Uas Xav Tias Yuav Muaj Thaum Koj Mus Txhaj Tag Cov Tshuaj Tiv Thaiv

Tej zaum koj yuav hnov zoo li koj muaj tej cov mob, uas nws yog ib cov mob los qhia tias koj lub cev tab tom tsim cov kab uas yuav los tawm tsam tus kab mob lawm. Cov mob yog muaj hnov mob los sis pom tias ib ncig ntawm lub qhov koob o tuaj, hnov mob taub hau, qaug zog, mob tej leeg nqaij, xeev siab, los sis ua npaws. Cov mob no yuav tsis mob ntev tshaj li ob peb hnuv.

Tej Yam Phem Uas Ntxim Yuav Muaj Los Ntawm Yam Tshuaj Tiv Thaiv Kab Mob Ntawm No

Txawm tias nws yeej muaj ib feem me me uas cov tib neeg ntxim yuav ntsib teeb meem tom qab lawv txhaj tag yam tshuaj tiv thaiv kab mob COVID-19 Johnson & Johnson los, cov txiaj ntsim zoo rau cov neeg uas lawv mus txhaj yam tshuaj no yeej muaj ntau tshaj li qhov phem. Cov teeb meem uas ntxim yuav muaj yog:

- Ntshav Tuag: Nws muaj ob peb zaug uas cov tib neeg txhaj tag yam tshuaj tiv thaiv kab mob COVID-19 Johnson & Johnson yeej tau muaj ntshav tuag (nyob rau ntawm cov hlab ntsha hauv lub paj hlwb, ntawm lub plab, thiab ntawm ob sab kav ceg), nrog rau txoj kev tsis muaj cov keeb ntshav txaus uas yuav pab ua kom koj lub cev tsis txhob los ntshav. Ntawm cov tib neeg muaj ntshav tuag, cov tsos mob yeej pib li ntawm 1-2 lim piam tom qab mus txhaj tag koob tshuaj thiab yeej muaj rau cov txiv neej thiab poj niam tib si, muaj rau tag nrho cov laus thiab hluas uas muaj 18 xyoo thiab laus dua; cov coob tshaj yog cov poj niam uas muaj hnuv nyoog 30 mus rau 49 xyoos. Nyob hauv ib mus rau ob lim piam tom qab txhaj tag koob tshuaj tiv thaiv kab mob no, nco ntsoov mloog saib puas txog siav, puas mob hauv siab, ob sab kav ceg puas o tuaj, puas pheej mob plab tsis txawj zoo li, puas mob taub haus heev los sis qhov muag puas pheej plooj plooj, nqaij tawv puas doog yooj yim los sis puas pom tej teev ntshav nyob hauv qab daim tawv nqaij uas nyob dhau ib ncig ntawm lub qhov koob txhaj tshuaj. Mus nrhiav kev kho kom sai yog koj muaj ib yam ntawm cov tsos mob ntawm no. Txij li thaum pib txhaj los txog tam sim no, peb yeej tsis tau pom cov tib neeg uas lawv mus txhaj cov tshuaj tiv thaiv kab mob Pfizer los sis Moderna muaj ntshav tuag li.

Txuas rau phab ntawv txuas ntxiv tom ntej



DAIM NTAWV TEEV COV LUS QHIA QHOV TSEEB: Cov Txiaj Ntsim Zoo thiab Phem Ntawm Yam Tshuaj Tiv Thaiv Kab Mob COVID-19 Johnson & Johnson

- Txoj Kev Fab Tshuaj Loj Uas Yeej Tsis Tshua Pom Muaj: Nws yeej muaj ib feem me me tias yam tshuaj tiv thaiv kab mob ntawm no yuav ua tau kom muaj kev fab tshuaj loj (ua pa nyuaj, lub ntsej muag thiab caj pa o tuaj, lub plawv dhia ceev, ua pob co thoob plaws koj lub cev, kiv taub hau, qaug zog), uas ntau zaus yeej muaj li ntawm ob peb feeb mus rau ib teev tom qab mus txhaj tag koob tshuaj. Yog koj muaj ib yam kev fab tshuaj loj, hu 9-1-1, los sis mus rau ntawm lub tsev khomob uas nyob ze koj tshaj.
- Tus Kab Mob Guillain-Barre Syndrome Uas Yeej Tsis Tshua Pom Muaj: Nws muaj ob peb zaug uas cov tib neeg yeej tau muaj tus mob Guillain-Barré Syndrome tom qab lawv mus txhaj tag yam tshuaj tiv thaiv kab mob covid-19 Johnson & Johnson. Guillain-Barre Syndrome yog ib tus mob, feem ntau yog muaj rau thaum kis tau ib tus mob, uas muaj nyob rau ntawm cov hlab paj hlwb uas lub cev rov qab tua cov keeb paj hlwb thiab ua rau tej leeg nqaij tsis muaj zog, los sis thaum mob loj heev lawm, nws yeej ua tau kom tuag tes tuag taw. Feem ntau ntawm cov tib neeg muaj tus kab mob Guillain-Barre Syndrome yeej yog muaj li ntawm 2 lim piam tom qab lawv mus txhaj tag yam tshuaj tiv thaiv tus kab mob COVID-19 Johnson & Johnson thiab feem ntau yeej yog cov txiv neej, coob coob tus yog cov muaj hnuv nyoog 50 xyoo thiab laus dua lawm. Koj yuav tsum mus nrhiav kev kho kom sai yog koj hnov zoo li koj tsis muaj zog los sis hnov zoo li muaj dab tsi pheej nce nce koj ob sab kav ceg, uas tej zaum kuj nce mus rau ntawm koj ob sab caj npab thiab lub cev tog saum.

Yog Koj Muaj Kev Fab Tshuaj

Yog koj muaj ib yam kev fab tshuaj loj, hu 9-1-1, los sis mus rau ntawm lub tsev kho mob uas nyob ze koj tshaj. Hu rau lub chaw txhaj tshuaj lossis koj tus kws khomob yog koj muaj ib yam teeb meem muaj nrog yam tshuaj tiv thaiv no uas koj hnyav siab los sis pheej tsis txawj zoo li.

Cov Koob Tshuaj Uas Txhaj Los Tiv Thaiv Ntxiv (Boosters)

Cov kab uas lub cev tsim los tiv thaiv kab mob thiab tiv thaiv kom tsis txhob muaj mob yeej ib txwm muaj tsawg zuj zus thaum lub sij hawm dhau mus ntev zuj zus lawm. Ib koob tshuaj uas txhaj los tiv thaiv ntxiv (booster) yeej yog ib txoj kev ntawm cov tshuaj tiv thaiv uas txhaj ntau koob sib law los mus ua kom ib tus neeg lub cev muaj kev tiv thaiv lawv ntawm ib tus kab mob. Cov koob tshuaj uas txhaj los tiv thaiv ntxiv yeej pab tiv thaiv tib neeg ntawm kab mob COVID-19, yeej pab muab txoj kev tiv thaiv kab mob hauv lub cev uas muaj tsawg mes ntsis lawm txij li thaum txhaj tag cov koob tshuaj uas txhaj thawj lwm kho kom rov qab muaj ntau zoo li qub. Raws li CDC thiab FDA cov lus qhia, yam tshuaj tiv thaiv kab mob COVID-19 Johnson & Johnson yog ib yam tshuaj uas tsuas pub coj mus txhaj rau cov tib neeg muaj hnuv nyoog 18 xyoo thiab laus dua thiab lawv yeej mus txhaj tsis tau lwm yam tshuaj tiv thaiv kab mob COVID-19 vim lawv muaj tej teeb meem mob nkeeg dab tsi, vim lawv yeej tsis muaj kev yuav mus txhaj tau lwm yam tshuaj tiv thaiv, los sis vim lawv yog cov neeg uas yog tsis txhaj yam tshuaj tiv thaiv kab mob J & J ces lawv yeej yuav tsis txhaj ib yam tshuaj tiv thaiv kab mob COVID-19 li. Cov neeg uas txog sij hawm rau lawv mus txhaj koob tshuaj uas txhaj los tiv thaiv ntxiv yeej mus txhaj tau yam tshuaj tiv thaiv J & J coj los ua thawj koob tshuaj uas txhaj los tiv thaiv ntxiv, tsis hais txog qhov tias saib yam tshuaj tiv thaiv uas lawv txhaj thawj lwm yuav yog yam tshuaj dab tsi li, tiam sis peb yeej xav kom neeg mus txhaj cov tshuaj tiv thaiv mRNA (Pfizer los sis Moderna) coj los ua koob tshuaj uas txhaj los tiv thaiv ntxiv. Koob ob ntawm cov koob tshuaj uas txhaj los tiv thaiv ntxiv yuav tsum yog cov tshuaj tiv thaiv mRNA xwb. Thov mus nyeem Daim Ntawv Teev Cov Lus Qhia Qhov Tseeb Hais Txog Cov Tshuaj Tiv Thaiv Pfizer los sis Moderna yog xav paub ntxiv hais txog koob ob ntawm cov koob tshuaj uas txhaj los tiv thaiv ntxiv. Cov tib neeg uas lawv muaj cai mus txhaj tau:

- Cov tib neeg muaj hnuv nyoog 18 xyoo thiab laus dua, tsis hais txog qhov tias saib lawv lub cev yuav tiv thaiv kab mob li cas li, yuav tsum mus txhaj thawj koob tshuaj uas txhaj los tiv thaiv ntxiv li ntawm ob hlis tom qab koob uas lawv nyuam qhuav txhaj tag.

Xav Paub Ntau Tshaj No Ntxiv

Yog xav paub ntxiv hais txog qhov tias yuav tos ntev npaum li cas mam li txhaj, thov mus saib [CDPH Cov Lus Qhia Txog Kev Txhaj Tshuaj Tiv Thaiv Kab Mob COVID-19 Raws Hnuv Nyoog](#).

Peb yeej tseem muaj ntau ntawv qhia ntxiv nyob rau ntawm CDPH lub vas sab rau cov tshuaj txhaj los tiv thaiv kab mob COVID-19 ntxiv (Booster).

